

Dat „Plattdütsche Wörbauk för 't OM (Ollenborger Münsterland)“ is bolle fardig

Arbeitsgruppe van 'n „Kring“ hätt dor veier Johr an arbeit't / Ümme 13.000 plattdütsche Wör (sammelt)

„Ick teuw all so lange up den ein'n Oogenblick“ sing dei Gruppe Ich + Ich – up Hochdütsch – in ehr Lied „So soll es bleiben“. Väle Lüe teuw tuck all wat länger up „Use Wörbauk“, dat plattdütsche Wörbauk för 't Ollenborger Münsterland (OM). Ick weit nich, wo faoken ick dissen Harwst fraogt worn bin: „Wanneiher is Jau Wörbauk denn nu fardig?“ off „Kummp dat Bauk tau Wiehnachten noch rut?“ Nu is 't bolle sowiet. Dat ganze Warks kann in 'n poor Daoge druckt un dann inbunnen wern.

Äöwer veier Johr häbht acht Lüe van 'n „Plattdütschen Kring in 'n Heimatbund för 't OM“ – Bernd un Anneliese Grieshop, Marga Siemer, Willi un Maria Thien, Maria Blömer, Kerstin Ummen un Alfred Kuhlmann – an dat Bauk annesäten. Maria Thien un Marga Siemer sünd inne Tüschkentied all verstorwen. Ümme 13.000 Wör häbht wi vanne Arbeitsgruppe sammelt un nao un nao in 'n Computer ingäben. Anne hunnert Maol hätt dei Gruppe sick draopen, aals naokäken un äöwer dei Schriewwiese van enkelde Wör sträwt – wecktiens (= manchmal) bit inne Nacht.

Nu mag dei ein off ännere fraogen: „Worüm hätt dat denn so lange düert?“ Nu: Wi häbht väle plattdütsche Bäuker – uck öllere – läst un uck ännere Wörbäuker studeiert. Weil dei meisten Lüe ute Arbeitsgruppe in Arbeit staoh, mössen wi aals nao Fieraabend un an 'n Wäkenenne maoken. Un nich tau vergäten, dat us dei früuhere „Kring“-Vörsitter Werner Kuper ut Baoken duusende van plattdütsche Wör vermaakt hätt, dei wi aale neit upschräwen häbht.

Wör dei plattdütsche Schriewwiese all aff un an 'n bäten stur, so har us dei hochdütsche Rechtschriewreform bolle anne Grund krägen. Wor du dor aale nao kieken moss, dat kanns bolle nich glöwen. Kien Wunner, dat dei DUDEN bi jede Uplaoge dicker wedd. Usen Herrgott wäs Dank, dat us Prof. Dr. Wilfried Kürschner vanne Uni in Vechte bi 't Naokieken Stütt un Stöhn (= Unterstützung) gäben hätt. Weer un weer hätt hei aale 13.000 Wör an sien'n Computer ankäken, daogelang. Aohne üm wör dat Bauk woll eierste tauken Johr Wiehnachten fardig worn.

Nu bis du bestimmt neischierig (= neugierig), wann man „Use Wörbauk“ koopen kann? Kiek dei nächsten Daoge man inne Zeitung, dor staiht dat inne. Un wenn du wäten wullt, off man dat Bauk uck noch ünner 'n Dannenboom leggen kann, dann sägge ick blots: „Ick glöw all, wenn us dei Computer dor kien'n dicken Strich döre Räkning maakt.“